

餘杭縣志卷三十

方外傳二

道家

漢

張道陵字輔漢建武十年生於吳郡天目山年及冠從學者千餘人天目山南三十里西北八十里皆有講頌之堂臨安神仙觀餘杭通仙觀即其地也永元四年樂蜀之溪嶺深秀遂隱其山永壽二年九月九日在巴西赤城渠亭山中雲臺峯白日昇天時年一百二十二歲也神仙通鑑

三國吳

餘杭縣志

卷三十

方外二 道

一

蔡經吳人也吳記云織田有蔡經宅杭州餘杭縣故基存焉吳天璽二年有神仙四人自稱曰東方朔等往來經所居孫皓將亡四人預以告經遂虵蛻而往顏魯公麻姑壇記云王方平過栢蒼蔡經家今台之仙居栢蒼之陽有經故宅豈仙家居無常所而各記之耶咸淳志

蔡經餘杭人嗜學仙術王方平偕麻姑降經家姑手爪似鳥經見之念背癢時好以此爪爬之方平即知乃鞭經曰麻姑仙人也何敢如是宴畢命駕昇天吳天璽二年以蛻

去

雲笈七籤

按正德姑蘇志載蔡經宅吳地記言在朱明寺西王方平與麻姑嘗過其家則是蔡經宅又在蘇州矣舊說相



傳率無定  
據類如此

晉

葛洪字稚川句容人性寡慾不好榮利遊餘杭山見何幼道郭文舉目擊而已各無所言時或尋書問義不遠數十里崎嶇冒涉期于必得尤好神仙導養法從祖元得仙以丹術授弟子鄭隱洪乃就隱學悉得其法後師鮑元元以女妻洪洪傳元業兼綜醫術咸和初選爲散騎常侍不就聞交趾出丹砂求爲勾漏令乃止羅浮山煉丹優游涵養著內外篇凡一百一十六篇自號抱朴子

晉書本傳

年八十一兀

然若睡而蛻

仙苑編珠

餘杭縣志

卷二十

方外二 道

二

郭文字文舉河內軹人少愛山水尚嘉遯年十三每遊山林彌旬忘返父母終服畢不娶辭家遊名山入吳興餘杭大滌山中倚木于樹苦覆其上而居焉亦無壁障時猛獸爲暴入屋害人而文獨宿十餘年卒無害餘杭令顧颺造之攜與俱歸颺以文山行或須皮衣贈以韋袴褶一具文不納辭歸山中王導聞其名遣人迎之既至置西園園中果木成林又有鳥獸麋鹿于是朝士咸共觀之文頽然箕踞旁若無人文居導園七年未嘗出入一日忽求還山導不聽逃歸臨安臨安令萬寵迎置縣中及蘇峻反破餘杭而臨安獨全人以爲知幾

晉書隱佚傳

文年十三歷華陰山石室



中得石函丹經習之後晉室亂乃入餘杭大滌山居十餘年鹿裘葛巾區種菽麥或採箬以貿鹽酪有餘卽施貧人一日有虎張口向之文視其古有橫骨乃引手探去明日虎置一鹿于舍外適有獵人來宿因指與之後虎服役如僕從令負箬隨行嘗置于鳳凰山側文貨藥歸晚虎嗥今名其地嗥亭王導聞其名遣迎置西園朝士咸在温嶠問曰飢思食壯思室自然之理先生獨無情乎曰情由憶生不憶故無情又問猛獸害人先生獨不畏耶曰人無害獸心則獸亦不害人又問世不寧則身少安先生不出濟世乎曰非野人之所能知也後復歸吳地記載先生嘗坎木

書之上曰金雄記下曰金雌記蓋讖晉祚也餘杭圖經云檢先生區種處尙在坎木處有泉亦稍堙塞梁乾化三年七月封靈曜真君今臨安冲虛宮武康郭林餘杭天真仙

洞亦各有遺迹

洞霄圖志

唐吳筠高士詠郭文舉云郭生在童稚已得方外心絕跡遺世務棲真入長林元和感異類猛獸懷德音不憶因無情斯言微且深

許邁字叔元一名映嘗謂餘杭懸霤山延陵之茅山是洞庭西門潛通五岳陳安世茅季偉常所遊處于是立精舍于垂霤而往來茅嶺之洞室晉永和二年移入臨安西山登巖茹芝有終焉之志乃更名元字遠遊著詩十二首論神



仙事嘗與王羲之書曰自山陰至臨安多有金堂玉室仙人芝草左元放之徒漢末諸得道者在焉後人莫測遠遊所終好道者謂之羽化初學記乾化三年封歸一真君洞霄宮志許邁嘗就郭璞筮之遇泰之上爻璞謂曰君元吉自天宜學昇遐之道時南海太守鮑靚隱跡潛遁人莫知之邁乃往候探其至要因立精舍陳安世茅季偉常所遊處王羲之爲立傳述靈異之跡甚多晉書附王羲之傳

杜曷字叔恭一字子恭錢塘人早孤事後母至孝師餘杭陳文子受法爲正一弟子夜有神人降云我張鎮南也汝應傳我道法故來授諸祕要曷每入靜室燒香能見百姓三

五世禍福章書符水應手卽驗桓溫至枋頭水涸糧盡爲鮮卑所躡謂弟子桃葉云恨不從杜先生言符堅未至壽春車騎將軍謝元領兵伐堅問以勝負曷曰我不可往往必無功彼不可來來必覆敗是將軍效命之秋也堅果敗隆安中示期化去諸道民弟子爲之立碑諡曰明師洞霄傳常就人借瓜刀其主求之子恭曰當卽相還耳旣而刀主行至嘉興有魚躍入舟中破魚腹得瓜刀神州古史考

唐

吳筠字貞節華陰人通仙詣美文詞舉進士不第性高介不合與時俯仰天寶初詔至京師明皇與語甚悅與帝言皆



名教世務帝常問神仙冶煉事對曰此野人事積歲月求  
之非人主宜留意求還嵩山及過江而漁陽兵作識者以  
爲知機後居天柱觀精思有感行教于江漢其文章與李  
白不相上下凡四百五十卷大歷十二年于宣城道觀焚  
香尸解弟子邵冀元歸葬于天柱山西麓私謚宗元先生  
筠常語其徒云當遷神于天柱石室蓋太上俾我煉脫之

處故從之

洞霄圖志下同

按吳筠兩唐書皆列隱逸傳新書稱爲華州華陰人舊書稱爲魯中之儒士兩傳但言其入嵩山依潘師正爲道士傳正一之法開元中南遊入金陵訪道茅山東游天台在剡與越中文士爲詩酒之會所著歌詩傳于京師天寶後中原大亂乃東游會稽嘗於天台剡中往來與詩人李白孔巢父詩篇酬和逍遙泉石人多從之竟

餘杭縣志

卷二十

方外二 道

五

終於越中無一語及天柱觀事鄧牧載入洞霄圖志或別有所本姑從之

潘先生不知何許人亦不詳其名字遍遊山川愛天柱山止焉自許郭二君仙去泉石荒蕪元封古壇亦且湮沒先生慨然發憤請諸朝唐元宗夙聞其名敕創天柱觀斷樵採爲長生之林錢武肅王碑略載其事觀有仙花靈鶴之類葉法善括蒼人三世爲道士卜居本州卯酉山有巨石橫道行者紆經避之遂投以神符石自起初善得道來遊天柱適錢塘江有巨蜃溺舟經涉者苦之青山鎮長沈愈來迎於是往焉時潮信未至投丹篆江際戮之以鐵簡鎮于江心遂絕其患至今舟楫無虞女冠玉真子亦善弟子纔十



餘歲卽絕粒誦黃庭經天寶間於天柱山得道今法善有  
天柱觀碣留山中

白元鑒西川成都府人高祖君敏武德功臣父洪演高蹈不  
襲封娶申屠氏生一子卽先生也元宗幸蜀時鑒爲威儀  
道士住上皇觀志在絕俗逍遙遐舉周覽山川訪前賢高  
蹈之躅得餘杭天柱觀止焉四十年矣元和十二載八月  
解化瘞于天柱山大滌洞東北嘗有山中十詠

司馬承禎字子微號白雲子河內溫人也居天台山事潘體  
元傳辟穀導引術後與陳子昂盧藏用宋之問王維孟浩  
然王適畢構李白賀知章爲方外十友睿宗召問對曰爲

道者損之又損以至無爲夫心目之所知見每損之尙不  
能已而况攻乎異端而增知慮哉帝曰治心則爾治國奈  
何對曰國猶身故遊心于淡合氣于漠順物自然而無私  
焉則天下治矣帝嗟嘆久之乞還山賜寶琴霞帔公卿贈  
詩送之常侍徐彥博總而爲序曰白雲記盧藏用早隱終  
南山後登朝見先生將還指終南曰此中大有佳處何必  
天台對曰以僕觀之仕宦之捷徑耳藏用有慚色女真謝  
自然泛海欲詣蓬萊求師至一山見道士謂曰天台司馬  
承禎名在丹臺身居赤城真良師也自然遂還求之得度  
沖舉一旦謂弟子曰吾于玉霄峯東望蓬萊常有真仙降



駕今爲青童君所召須往矣俄頃蛻去詔贈銀青光祿大夫謚正一先生帝親爲製碑韋渠牟作傳

夏侯子雲從峨眉山來年二十狀貌甚古投司馬承禎夙興夜寐勤侍巾盥凡十數年未嘗一日怠缺與物無競不屑世務及禎羽化乃于大滌山中築藥圃種芝朮之屬嘗言古聖人以上藥養神中藥養性下藥遣病嘗有藥圃詩好作詩輒棄其藁故罕有傳者或縱神游目熙熙自得歸院則掩戶經日寂無所聞有隣院道士窺見一草衣人同坐亦瞑目不語至暮啓關伺之則無所見天復中乘異獸歸隱東峯不知所在

朱君緒字法滿餘杭人入天柱山數年道成一日微疾倏起命水澡浴具冠褐焚香端坐暨齊物朱蹈光等知當羽化卽跪泣而辭緒曰吾于彭殤存亡齊之久矣言訖而逝時開元八年五月二十九日

閻邱方遠其先齊人嬰之後也幼慧辨學于廬山道士陳元悟尋傳法籙于洞霄宮詮太平經爲十三篇景福庚戌歲始居餘杭大滌洞彭城王厚加禮遇重建天柱宮俾居之王奏請賜紫又勅賜號元同先生江東羅隱每就方遠授子書方遠必瞑目而授餘無他論門人夏隱言謂方遠曰羅記室令公上客先生何不與之語方遠曰才高性下吾



非授書不欲及他事降聖節前一日王使人以香花至方遠受訖乃入齋中作控鶴坐怡然而逝異香滿室吳越備史

方遠字大方舒州人生州之天柱山下二十九歲師香林

左元澤既得道已乃徧尋名山至餘杭天柱異而止焉蓋

餘杭與舒州咸有天柱山傳記所載天有八柱者也錢武

肅王師事之號元同先生表奏其道業於朝昭宗賜號妙

有大師天復二年二月十四日沐浴焚香端坐返真顏色

不變有異香三日方散是夜武肅王夢先生騎鶴話別明

日訃至及就壙但空棺而已後有人見有廬阜自言我捨

大滌歸隱潛山天柱源也洞霄圖志方遠葬于大滌洞之旁白

餘杭縣志卷二十 方外二 道

鹿山後天台山方外志要

羅隱元同先生草堂詩二首杳杳洞天路蒼蒼大滌山景真留不住麾節去應閑相府舊知己教門新啓關太平匡濟術流落在人間常時憶討論歷歷事猶存酒向餘杭盡雲從大滌昏往來無道侶歸去有台恩自此元言絕長應閉洞門

附羅隱第五將軍于餘杭天柱宮入道因題寄詩曰交梨火棗味何如聞說茗川已卜居瓦榭尚攜京口酒草堂應寫頴陽書亦知得意須乘鶴未必忘機便釣魚却恐武皇還望祀輓輪徵入問元虛

鄭元章字博文幼號神童十五歲辭親學道依真系大師李

歸李特為建星壇授上清畢法精修不倦景福二年與元

同先生同居天柱山精思院武肅王因命入開元宮啓建

壇錄王表奏朝廷云啓建日有彩雲臨壇仙鶴數百旋繞



空中昭宗賜紫衣號正一大師冲素先生累乞歸山王親  
駕送于郊外至精思院旬日間忽沐浴端坐脩然而逝體  
柔如生年六十八葬于本山

洞霄圖志下同

吳越

暨齊物字子虛師玉清觀朱君緒受法籙神符祕方救物不  
怠後隨入大滌山精思院剏垂象樓又名書樓積書數千  
卷其上日以著述爲事每講貫道學聽者嘆服錢氏賜度  
弟子對曰樂靜久矣不願有之所居室壁東西各置一竅  
採煉日月光華每語人曰吾不久往羅浮石樓矣一旦不  
知所之

餘杭縣志

卷三十

方外二 道

九

按舊縣志誤作暨物齊今據洞霄圖志改正又按十國春秋云暨齊物一作濟物字子虛杭州人餘與洞霄圖

志同

宋

馮德之字幾道河南人少習儒業書無不讀京師號馮萬卷  
不慕聲利棄家入道被旨住杭州洞霄宮時公卿皆以詩  
餞行宋真宗銳意道教盡以祕閣道書降餘杭郡俾知郡  
戚綸漕使陳堯佐選先生及朱益謙等修校成藏以進號  
雲笈七籤初詩人潘閬與先生爲道義交任泗州參軍卒  
先生囊其骨歸葬天柱山錢易銘潘墓具載其事

按舊縣志誤作馮得之今據洞霄圖志改正



李絢送天柱馮先生詩閑馳風馭恣飄飄因失仙班幾度朝紫閣舊隣秦樹老赤城新別海山遙飛鳧又說春經巖叱橘曾今夜探潮不是桃源不歸去故人多半在煙霄

按李絢字見素洞霄詩集直作見素又舊縣志載此詩為陳堯佐作

王欽若送天柱馮先生詩鬱蕭宮殿倚雲霓玉氣珠輝冠紫微暫到帝城朝斗會却思巖竇負琴歸日奔內景乾坤靜笑漱清音杞菊肥却到水鄉深遂住晴嵐掩映簇春暉

常中行錢塘人師河南馮德之形貌奇偉篋無留金所有一簫一笛而已常曰陰符經有強兵戰勝之道非外事也亂吾真者不能入即戰勝爾多往來餘杭浣坎得錢悉市酒有趙道人啖瓦礫如餅餌先生一見愛之引入臥內對飲達旦每醉則袒肩曰皮如鐵肉如石皆從修養得治平四

餘杭縣志

卷二十

方外二 道

十一

年六月語弟子沈曰益曰吾不久居此偃臥俄頃起曰嗟乎吾未能出即于几案間設鑑一水盂一時時取視之神色怡然越三日而逝葬天柱峯下或芟壙草見兩竅僅啓驚諸衆觀之探以杖空空如也歲餘其徒有解后於茅山者

葉彥球錢塘人崇寧間受度尋師方外遡長江上荆漢浮沅湘訪天師遺跡南遊吳越過閩廣徘徊羅浮以歸遂走京師寓寶籙宮復還洞霄由是銳意教法飛章走檄禍福之驗聳動當世至安吉之烏鎮鎮南有地爽塏乃卜居焉以符水為民禳禳疾無不愈先生兩領洞霄晚益精勵賜號



虛靖靈一大師於蛻龍洞之旁築室老焉天台虞公似良榜曰歸雲壽八十四無疾而終

唐子霞未詳其字宋政和間入道洞霄宮性嗜讀書而尤長著述謂大滌洞天歷千五六百年其間幽人勝士高行危言不得有傳于世私切痛之乃著書名大滌洞天真境錄自爲序後遠遊莫知所終

石自方字元矩饒州番陽人師冲寂大師孔守容爲道士長七尺餘龐眉秀髯大耳高顙音聲如鐘莊靜淡泊有深沈之思經史百氏無不通尤嗜莊列書眉山陸惟忠授丹訣往來西山廬阜與方外隱逸以琴酒自適嘗自號渾淪道

人時虛靖大師作庵於龍虎戲珠峯先生至卽下榻榜曰渾淪庵虛靖被召拉先生偕行居無何返故廬朝廷方求巖穴奇士部使者以先生聞強起至京師徽宗幸寶籙宮講所先生在焉上望見儀狀魁偉召前問從何來對曰草野臣無他技能江東使者以臣應詔卽日授金壇郎主杭州洞霄蓋宣和元年冬也明年七月至宮四方學道者翕然從之冬十月盜起嚴徽間明年正月破臨安縣官吏散走其徒亦治舟請行先生曰吾被天子命主此宮守死吾職也公等第去已而賊至先生正色叱之遂遇害門人程用光叩閤言死事狀上閱其忠賻錢三十萬贈正素大夫



制書云敕故金壇郎石自方頃者盜嘯浙東侵犯隣壤而居官任職者往往驚遁爾典司真館秉志不回叱罵兇徒遂致蹈難賜頒賻賚超進道階非獨勸死節者之榮而亦爲偷生者之愧時東南死事者財三數人土大夫以此高之平生有詩文數百篇以先生死節洞霄號石洞霄曲肱先生熊彥詩作石洞霄傳

按府志舊縣志俱無石自方傳而有唐子霞傳府志引嘉靖通志則云唐子霞自號渾淪道人盜起臨安遇害云云舊縣志則云唐子霞尤長著述撰大滌洞天真境錄盜破臨安縣遇害云云是皆誤以石自方之死節而實之唐子霞傳也溯其致誤之由蓋唐子霞與石自方兩傳一見於大滌洞天記再見於洞霄圖志兩書皆鄧牧所撰兩傳相連當留傳至嘉靖修志時採訪所見之本必有脫落修志者遂誤併兩人之事爲一人耳今幸

餘杭縣志

卷二十

方外二 道

十三

洞霄圖志刊本行世可校而石自方之死節始彰舊通志府縣志相承之誤一日更正矣

何士昭餘杭人自幼脩真師大洞道士胡處邦受度戒行清勤數學不倦被旨典宮事賜度牒三百餘道又令本路漕臣應辦工役一新宮宇重和元年十二月五日召其徒告曰吾歸矣弟子環侍至夜半方就榻聞異香盈室亟視已逝時境內往往聞鐘聲後二日探囊得一紙書頌云五十年住人世靈臺不染纖瑕壬午三更子後天開萬里無霞蓋是日壬子也賜號沖靖大師

陸維之字永仲一名凝字子才餘杭人少以計偕入汴道遇異人謂曰秀才難望科第不如還山贈以丹一粒且戒俟



緩急用之及下第歸舟循汴河風激浪怒且將覆追憶前  
語以丹投之風浪始息河上有呼其姓名者則所遇異人  
也自是有超世之志隱于大滌山之石室人因以石室稱  
之逍遙林谷詩酒自娛嘗觀潮錢塘有醉江月詞云遠山  
一帶遡晴空極目天涯浮白楓落鴉翻談笑處不覺雲濤  
橫席酒病方蘇睡魔猶縶一掃無留迹吳帆越棹恍然飛  
上空碧長記草賦梁園凌雲筆勢倒三江秋色對此驚心  
空悵望老作紅塵閑客別浦煙平小樓人散回首千波寂  
西風歸路爲君重噴霜笛高宗嘉賞欲召見辭疾不赴及  
上退處北宮嘗幸大滌憲聖亦偕行上問山中詩客或以

維之對進其行卷上讀數首太息曰布衣入翰林可也欲  
歸與孝宗言之憲聖曰山林隱士必不求名強之出山乃  
大勞苦遂止未幾以疾卒太博關注子東贈先生詞序云  
吾鄉陸永仲博學高才自其少時有聲場屋今棲白鹿洞  
下絕輦酒屏世事自放塵埃之外行將六十而有嬰兒之  
色非得道者能如是乎乃作水調歌頭一闕詞云鳳舞龍  
蟠處玉室與金堂平生想望真境依約在何方誰信許君  
丹竈便與吳君遺劍只在洞天傍若要安心地須是遠名  
場幾年來開林麓建山房安眠飽飯清坐無事可思量洗  
盡人間憂患看盡仙家風月和氣滿清揚一笑塵埃外雲



水遠相望先生嘗進百論有石室小隱集三卷臨終了然  
書一詩云岳南之館白雲端鳳笛龍簫徹廣寒一鶴曉飛  
沖碧落羣仙笑倚玉闌干有石室小隱集三卷

喻天時字齊仲號蟾華子自幼肄業洞霄政和間以詩科試  
中選精天文歷數讖緯醫藥之學至驅雷召雨旋著靈異  
宣和間敕住信陽軍神霄萬壽宮朝廷屢遣使降香祈禱  
有感賜號沖和先生淳熙三年故人徽州太守沈君禮遇  
之一日別太守云上天召我朝廷亦召我且應上天召也  
第去之日疾雷大雨毋恐居旬日信然太守具其狀上聞  
朝廷果欲召之且遣使矣先是嘗語其徒曰我死歸雷部  
于大滌山棲真洞側

餘杭縣志

卷二十

方外二 道

十四

爲仙君治世間不平事是時以雷雨爲驗其徒奉喪歸葬  
王朴字元素其先北京大名府人避地轉徙至臨安愛金岫  
山川之勝因家焉初蜀之青城有方士五結侶東南游至  
浙右中一人忽曰吾塵緣猶未斷更當爲人子三紀揖衆  
別去莫知所之先生父球以積善聞鄉里室潘氏孕及月  
一夕夢偉丈夫衣冠甚古跨白鹿入門驚寤而生先生方  
在襁褓口吻常咿嚶若有所誦人以葷茹啖之輒搖手作  
麾去狀旣長丰神峻整未嘗學詩而觸景吟詠不凡及冠  
苦不願娶父母訶責不得已受命婚之夕婦至乃從間道



出走家人徧索得之野外力挽以歸既得子而婦喪長嘯  
曰吾責已塞况有二弟可與父母訣矣遂棄家結茅大滌  
山石室與隱士陸永仲鄰居講求修真鍊養之術有間則  
更倡送和見者咸謂興寄飄飄不食煙火語後歸省親其  
舍旁有嶺一綫之蹊臨懸厓千仞往來苦之先生贊其父  
闢爲夷塗翼以闌楯以便行者訖工乃歸未幾沐浴趺坐  
而化年果三十六永仲遣報其家翌日父母俱來忽舉首  
開目微哂復瞑陸君讚其像曰彭氏之壽顏氏之夭誰得  
誰失春花秋草山雲卷舒水月昏曉本自不動彈指中了  
瘞於石室之麓有一白鹿呦呦循行冢上忽不見其徒以

其字私謚元素先生

按舊縣志載此傳  
誤作王林今改正

楊迺誠字叔閑潼川人爲州之定光觀道士東游襄漢荆吳  
久而息大滌山中形貌頎嶮顏如渥丹目光射人帶索苴  
布寒暑如一飲酒至斗不醉或終日坐林中無知者名聞  
當時高宗居德壽宮召見與語甚悅慈福太后問道要以  
師事之爲築室於宮之通明館側又建庵西湖延祥觀以  
便往來棲息有旨促召則麻鞋入見淳熙初力乞西歸越  
三載旨遣使往唁方見其坐蛻旋具奏內修黃籙追嚴之  
命高士何守澄進青章有云仙凡相遠罔知修短之期道



俗雖殊固有師資之禮

陳良孫南渠人童年得道隱居杭吳山修煉丹成獨喜天柱  
每與友人韻士往來其間常離地三尺懸虛而臥因號寢  
虛先生窮冬積雪浴溪澗中略無寒色自餘靈異不可殫  
紀有紫極觀過天柱山詩云道在吾身宇宙寬朝踰雲岫  
暮雲關丹靈不服春風轉欲度世人那得閑

按舊縣志誤作  
陳良生今改正

李洞神字雲友新城人自幼不茹葷酒嗜黃老學七歲入洞  
霄受度刻意道法戒行嚴潔中年走淮海謁徐神翁密有  
所得歸屏人事宴坐林下高宗賜號明素俾主寧壽觀未

餘杭縣志

卷二十

方外二 道

六

幾乞還山授右街道錄主洞霄宮孝宗踐位召使拜章旋  
卽昭格乾道九年正月晦日草別書遺同道偃然而寂嘉  
興錢公敘其行業刊于遺像有云周流六虛去來自若死  
而不亡先生有之贊曰去知而愚性含太初視有若無心  
包太虛生而神悟密契道樞死而神在超頌遺書

金致一字常清幼無怙恃粲然一身入洞霄師舒元一知識

日進頗有超然出塵之致卽舒公所生處築元清宮

洞霄宮志

按洞霄圖志不載金致一傳惟于陳希聲傳有云師  
凝妙大師金致一是一致一又有凝妙大師之號矣

陳希聲字震甫臨安人師凝妙大師金致一以行業清高際  
遇高宗授右街鑒義俾主洞霄宮提綱嚴肅獎拔後進一



時學者嚮風乾道二年三月車駕臨幸山中扈從登遊東  
西巖洞賜御書度牒號凝和大師又書度人經賜焉淳熙  
三年九月談笑而寂壽六十有九

洞霄圖  
志下同

徐仲淵字叔靜姑蘇人自號栖霞子嘗浪迹江湖間淳熙中  
被召居太乙宮高士齋已而奉詔典洞霄通明館久之會  
孝宗居重華宮召寘祐聖觀凝神齋嘗奉命和御製秋懷  
詩二篇詩云東壁星辰爛不收夜涼河漢截天流芙蓉院  
靜琴三疊翡翠簾開月一鉤黃屋非心辭大寶碧雲有意  
思高秋金聲玉振掩前作漢祖空懷猛士憂天末虹蜺晚  
未收龍池新雨漲清流鷗緣適意頻依渚魚不貪香懶上

鉤賸喜三邊無警報况當萬寶得成秋嘯歌高蹈羲皇上  
不復深貽海內憂又令進西游詩上覽之謂侍臣曰近世  
士大夫詩有不及者時豫章玉隆觀主席方虛高士謝守  
顯薦于郡即日具禮走京師迎之居歲餘假化朝奉郎府  
倅邱公琛搜其詩數百篇刻觀中號經進西游集

俞延禧字得厚臨安人受度于洞霄宮自號竹林道人襟韻  
洒落善丹青高宗賜御衣象簡遷授道秩後以古澗松進  
孝宗御製詩賜曰犖确奔流瀉玉虹凜然雲幹擬蟠空紅  
塵車馬稠如織夢入蒼煙萬壑風嘗自寫神恩平郡王見  
之賜讚曰日角月淵天賜怡然丹青妙筆秉鑑自傳妙中



之妙元中之元不知誰氏子乃玉京之謫仙孝宗又賜以  
怡然二字俾主寧壽觀未幾乞還山復俾知洞霄宮隨亦  
退閑住通明館脩然棋局間恬如自養淳熙十四年二月  
十五日與道侶對棋拈子稱好著而化高士徐冲淵弔云  
千里雲煙三尺畫百年生死一枰棋

王伯淮呈得厚宮主先生詩云九鎖松門夜不關蓬萊分  
境到塵寰仙風鶴駕來天表白晝雲旗下世間古洞得泉  
消俗病名山有藥駐童顏何當  
常對先生面願借飛鳧日往還

王思明號竹庵臨安人爲王冲素弟子性嗜書編錄滿案餘  
閒寄興風雅與龔冲妙章清隱潘怡雲結山中吟社當世  
重之寧宗慶元間賜純素大師同領宮事放翁陸公游喜

餘杭縣志

卷二十

方外二 道

六

與交爲撰洞霄宮碑謝別放翁詩云還丹一粒如粟大點  
鐵成金金不壞服之冲舉騎蒼龍直上九霄觀世界君藏  
此藥天下知鬼神正眼那能窺歸磨蒼石寶君施文章與  
此元無異真跡尙在壽七十餘卒有竹庵詩稿棲真洞神  
光記

張堯臣寄洞霄道士王竹庵詩一笑相逢已隔秋人間多  
事苦相留亂雲有路通仙境清夢何因訪昔游白日無情  
傷老大青山此地可藏修與君  
宿有誅茆約爲卜來賢一室幽

何昞贈竹庵王先生詩巾子孟肯復聽齋鐘隱處何妨作退  
翁一榻但留詩軸伴萬緣都付酒杯空松顛舞月歸巢鶴  
竹下敲門採藥童風定雲眠  
人不到倚闌凝目看飛鴻

龔大明字若晦仁和人七歲讀書一再過輒成誦其家與洞



霄胡先生志行族相鄰先生省親奇之引歸度爲弟子弱冠遇異人得修煉旨神采秀發積三十餘年升山中主席力辭弗獲強起應緣者四十年自宴坐外以吟咏自適有南軒藁平淡清逸可觀先是山中留題至多久皆散滅至君始哀爲集併刻洞天真境錄寧宗聞其名召至禁中齋修感格及旬歸上曰卿居洞天與此間孰勝對曰陛下居天上洞天臣不過人間洞天耳安可相方然人身自有洞天神明居之貴賤一理存存於中不爲外邪客氣所據則道同仙聖足以無愧於洞天之居上稱善賜紫衣賜號冲妙大師遺金幣甚厚還山建法堂復賜書演教堂扁理宗餘杭縣志

卷二十

方外二 道

九

朝以國事擾攘遣內臣劉世亨等諭旨欲鑄鐘以卜休咎齋金五十兩白金五百五十兩令合精銅爲之一鼓而就發音清越詔降內帑設普天醮謝恩併鐘樓改作由是宮宇一新嘉熙丁酉秋語其徒曰吾住山緣事畢矣遂掩關不問世事宴坐累月明年仲春扶杖出山徧詣親舊若告別者歸經夕而逝容貌如生壽七十有一

按舊縣志誤作龔大名據洞霄詩集作本山道士龔大明號山隱今改正洞霄詩集載其贈道友雪崖朱先生詩云清高絕俗雪崖翁向上元機頓觀通金鼎有丹成九轉凝然宴坐白雲中又贈道友怡雲潘先生詩云九轉工夫真妙絕丹爐進火徐徐熱離龍坎虎自歸降姤女嬰兒共歡悅天機密運造元微精采神光迥然別枝頭結果有時紅驂鸞跨鶴神仙別



孫處道字元素餘杭人嘗夢幢節迎導入大宮闕主者勞問  
殷勤若有囑咐未幾隨父入天柱山指樓閣曰此正疇昔  
夢見者師冲妙先生嘆曰天意昌吾大滌使爾來耶長通  
老列莊書精琴棋嗜丹青序升主席賜號靈濟通真大師  
理宗賜度牒買田陽羨築塘立圩不數月集事又賜璉川  
田以益之爲書洞天福地四字仍賜書清淨經一卷景定  
甲子彗星見東南每夜起觀咨嗟謂左右曰應在今冬吾  
不及見矣七月十七日召徒衆戒飭特異常日俄頃整衣  
冠端坐而逝年六十二是歲冬理宗升遐其言悉驗

貝大欽號懶雲餘杭人入道洞霄宮住三十年延納雲水日

餘杭縣志

卷三十

方外二 道

三

親視廚饌無闕得陳季卿故址建洞晨觀修黃籙普度萬  
餘各自邑至宮十八里道路崎嶇行者以爲病捐資買石  
甃爲夷塗理宗賜號靈一大師壽八十六

程浚呈貝懶雲先生詩一片閒心祇在山故將疎  
懶傲塵寰白雲猶有往來意師獨蕭然天壤間

徐應庚餘杭人貝大欽之徒好學日鈔夜誦卒成才同衣稱  
徐白眉贊貝師甃路親董工役不避寒暑增土築塘架石  
爲梁夾路樹林木閱五年成亦解化壽五十餘

朱真靜字復堂臨安人自幼好學丹經元文一覽輒通其意  
嘗意行經宿忘返諸徒方驚憂忽歸云吾遊大滌洞遇道  
人碧巾黃衣相攜至馴虎巖下坐語移時而已不謂經宿



也題壁間曰經書那得語虛無荆棘林中有坦塗不遇異人真口訣誤人錯下死工夫一日整冠裳謝同衣遂登石室宴坐垂二十載名聞于朝遣中使召不起初先生入山猛獸巨蛇屢至左右舉手麾之悉遯去有病者扣門求救噓氣按摩無弗愈者淳祐癸卯夏語諸徒曰吾卜中元別此山矣及期書偈曰去來如一真性湛然風收雲散月在青天趺坐而化理宗聞之哀悼賜宸翰特贈妙行先生

元

貝守一號月溪餘杭人通經史貝大欽剏洞晨觀命開山領袖齋道員千人築居避喧丈室久之遷九鎖外山庵有月

餘杭縣志

卷二十

方外二 道

三

溪藁鏤板行世畜海上奇方施藥十餘年不倦自洞晨退席散衣鉢遺諸徒及親識惟存布衲二廿餘年不改操至元戊寅序升主席授凝真抱素大師庚辰九月無疾泊然而化壽八十二

周允和字謙甫號青溪仁和人初生有雷殷殷發地下隣里驚異十八歲入大滌師冲妙先生性淳謹奉師長不憚細務交遊無親疎極力周急作詩無塵俗氣遊江湖間遇可師者輒請傳性命學瞑目宴坐或終日宋淳熙初宣醮內庭賜號妙有大師七年開山冲天觀未幾遷太一宮觀妙齋高士與褚雪巘郭似山爲方外友丙子春避地山谷間



鄉隣相率衛之曰勿怛吾善人至元戊寅授崇道沖應清  
真大師洞霄主席壬午三月兼領太一宮秋九月復還九  
鎖乙酉七月初夢游大滌洞天見數仙人吟咏一指示云  
蒼然聳空碧指點人不識我來契宿緣鐫記雲根石二十  
五日沐浴正衣冠召徒衆環集云疇昔之夜夢游有頌仙  
人示我歸期記日錄昨暮見星大如月西墜今往矣歷歷  
敘別已端坐而化神色不變自朱妙行尸解後再於先生  
見之壽六十六

按宋淳熙初當是宋淳祐初洞霄圖志傳刻訛也下文  
七年是淳祐七年至丙子春爲至元十三年其時宋室  
將亡干戈滿地故云避地山谷戊寅歲則恭帝已蒙塵  
北去江南版籍歸元崇道沖應清真大師之號卽世祖

餘杭縣志

卷二十

方外二 道

三

所授也

金正韶字九成號約山餘杭人早歲師桂林舒公石室洞讀  
書十餘年宋度宗召爲龍翔宮書記至元間主洞晨觀授  
沖素大師名山講師所居文籍山積展玩耽讀至忘寢食  
雖病手不釋卷尤深性理之學庚寅秋解化留書法卷云  
生死事急不及候歸了無遲戀意年四十七學徒舒逢原  
集其著述傳山中

郎如山字魯瞻號一山餘杭人精教典師洞霄明一先生楊  
公明一師凌公中年目眇躬侍飲食澣濯無憚勞苦宋景  
定間居延祥觀賜號總教大師欲升道秩辭願榮親上從



之官其父必聞迪功郎會靈濟孫先生被朝命益廣常產  
公贊襄爲多至元丁丑閱山西湖崇真觀逾年領洞霄宮  
主席兼西太一宮掌浙西道道教得南唐趙文懿故居建  
通仙宮以便雲水戊子御史中丞崔彧訪之以公入覲暨  
乞歸奉旨蠲宮門租賦元貞初授體元崇教安道法師兼  
管本山諸宮觀事賜宮錦金衣一襲丁酉十一月初五日  
無疾而逝壽七十有二

楊清一字元潔號逸峯臨安人耶如山之徒蚤遇明師精於  
符法特達好施與登餘杭後塘路建石門通仙橋宋咸淳  
七年召爲東太一宮法師至元後改陞西太一宮繼郎公

席丙申秋以郎公命捧香詣闕賜衣亦與焉授沖真洞元  
葆光法師歸領杭州路道錄郎公羽化己亥八月消吉治  
葬預陳祭告哀慟而死壽五十七

呂貴實字若虛休寧人通儒業慕陸永仲隱居來遊爲道家  
流以石室自號襟韻灑落宋度宗召爲開元宮書記則堂  
家鉉翁知鎮江檄領紫府觀與天慶聶先生友善至元丁  
丑舉公代之授明一凝虛沖妙大師兼本路道錄多以琴  
棋觴詠交游搢紳間時則堂寓河間不遠千里往見得贈  
詩云陋巷久無佳客過眼明忽見洞中賓要將昔日黃梁  
夢說與人間未悟人少年初記識君日老去相逢天盡頭



徒步天涯見坡老世間能有幾元修謂巢元修徒步萬里  
見東坡於海南也年五十二預知死期別知識終于天慶  
方丈篋空無儲惟古書百餘卷其徒囊骨歸葬家山

阮日益號鶴巖於潛人受度於里之天目元雷山真慶觀鶴  
形古貌苦志食淡徧游湖海通性命學讀書展卷悟解註  
道德南華二經自成一家早歲兀坐于天目石巖中至寒  
暑不動其鄉星渚趙侍郎尤所敬愛爲築庵所居觀後靜  
坐四十年大滌山菊巖龔先生亦爲築庵石室延請居之  
有泉州陳道士志同修煉遠來相依一時學者咸嚮風焉  
既久復還故山自是不出至元年間尸解仙去壽八十餘

葉林字儒藻一字去文號本山錢塘人讀書博探古雅詩文  
多有正體特立獨清性無苟合布衣飄然故人留之輒止  
止亦不久餽之輒不受往來甚輕片楮亦不能攜歲丙戌  
遊天目至九鎖山沈高士介石招致所營沖天觀小室介  
溪山間日一食二十年如一日或強飲亦不拒至醉飽兼  
人間亦不食三數旬唯啖果蔬顏色自若遇積雪登巖谷  
四顧月下獨步林影間深夜忘返每芳時良夜遇物觸景  
必見之吟咏至成長短句解意宛曲如真有情經久亦能  
記誦之無傳藁四方慕者洎名公達官排闥請見對客箕  
踞寄傲自若或欲薦之朝聞其清議而止時里人鄧牧亦



隱大滌白鹿山房與林深相得山中爲作行窩其間每月  
夜必往其處相與劇談甚適弗往牧則詣焉李坦亦錢塘  
人年僅二十餘深究詩家法度與二公爲師友嘗遺詩云  
空山歲暮寒氣集霜葉塞徑人跡沒風吹古澗水生鱗雪  
落枯林木摧骨葉公凍餓山之阿衣弊不補雲牽蘿冰霜  
肯奪烈士氣梅花一榻春風多東峯鄧公公畏友一節同  
高良不偶閉門兀坐鍊精魄松根爲糧蜜爲酒山中郭許  
不復還天壇石室蒼苔斑千年之後公等出名山之各當  
未畢乙巳冬葉公元兀危坐幾兩閱月所親張氏家臨平  
有兄子依焉僧復文嘗築室待公偕隱遣書報行期旣皆

來明日書偈案上泊然而化大德丙午正月八日也壽五  
十九瘞書劍冲天觀西步竹塢有遺稿傳山中衆稱曰高  
行先生

王濟敬高行本山先生詩高行先生道獨尊結茅鑿翠倚  
雲根煙霞有趣分風月文字爲心付子孫片影橫江深夜  
鶴數聲驚曉故山猿九霄環  
珮知何處古木殘陽幾斷魂  
孫晉燕山懷葉隱君詩山人長在洞天居不是吟  
詩定讀書笑我驅馳數千里秋風兩鬢欲何如  
朱維則慕本山葉先生詩冰霜行業竹松閒葉落  
歸根在此間可惜蘭亭無二本哀猿聲斷月空山

鄧牧字牧心家世錢塘自號三教外人年十餘歲讀老莊悟  
文法下筆追古作者及壯視名利薄之遍遊方外歷覽名  
山逢寓止輒杜門危坐晝夜惟一食歲己亥入餘杭洞霄



止焉身不衣帛服楮禦寒嘗遇異人受修鍊法至是於宮之超然館入室宴坐或數月不出四方以文字請每一篇出爭傳誦之非其人求之厚餽勿爲也沈介石爲營白鹿山房石室顛居之最深處扁曰空屋公作記命工鑿石奇甚左右植梅竹與五松相間時里人葉林隱九鎖山冲天觀有行窩山房中與公爲深交忽一日謂同道曰吾二人不久他往似有言別意大德丙午正月八日葉林坐蛻牧誌其墓踰半月亦無疾而化瘞劍履于石室洞下壽六十嚴陵胡汲古別爲作傳有洞霄宮志游山志雜文藁傳山中衆稱文行先生

鄧牧字牧心錢塘人宋亡不仕至元己亥入洞霄止於超然館沈介石爲營白鹿山房居之後無疾而逝牧與謝翱周密友善二人皆抗節遯迹者嘗爲翱作傳爲密作蠟屐集序而翱傳敘交情尤篤臨卒適牧出遊翱作詩有謝豹花開桑葉齊戴進芋生藥草肥九鎖山人歸未歸之句九

鎖山人牧別號也其志趣可想見矣

四庫全書提要

王濟敬文行牧心先生詩儒參元學更通禪三教歸宗合自然寄隱自娛閒歲月養高多占好林泉翠蛟亭在吟誰和自鹿山空骨已仙椒酒漫澆墳上土風吹老淚夕陽邊

吾衍懷鄧葉二逸人詩鄧叟養其內山房事畔烟葉公澹無爲不食忘歲年峨峨九鎖山隱此洞府仙道備出塵鞅遺軀蛻秋蟬臨化別所知既去形宛然萬象有凋弊兩翁道元元山空失高雲洞冷滴暗泉仙傳或可繼吾當播真



徐良杞留別牧心鄧先生詩岡巒縹緲九鎖崖斷若無路瀾底松聲長石上苔色古深山早霧積慘淡日未吐一逕入數里翠滑不留屨五洞環大滌諸峯拱天柱鄧公我故人結屋峯南住相見悲歲月連牀聽風雨燈前一樽酒欲盡平生語明朝恣登覽清事不一數窮幽力未倦回首天已暮東望思故鄉翩然下山去

朱維則慕鄧牧心先生詩雪虐風饕梅自開歲寒然後見真才纍纍巖石藏吟骨容得春深長綠苔

舒元一本邑人始住洞霄宮後築元清宮於臨安之新路卽元一故居也至元中賜通明養素真人冠素法服爲時榮

遇同觀之士稱爲桂林先生洞霄宮志

馬紹元貞丙申九月十五日東平馬子卿謁洞霄宮題詩錄謝郎一山及舒桂林偕行濟南張可與大名欽伯祥沐梁楊威卿高祐之詩雨晴秋氣清復清肩輿畫出游山行山中泉石解相愛磨洗老眼十倍明琳宮恍若蓬萊島道

餘杭縣志

卷二十

方外二

道

三

士疑有安期生洞天丹井見古跡棲真瀑布非空名天風吹來巖谷響天風吹去雲無聲我生自有山人相賓友宿皆仙府卿心融意釋不可說何者爲物何爲情明宵歸去足夢寐不須更覓芙蓉城

陳義高呈郎一山舒桂林詩仙家日月能久常嘯詠金闕歌天章嵯峨一山倚天勢桂林萬古吹秋香丹泉泠泠漱

夜月傑閣聳聳明朝陽巖翁醉後星斗煥掀髯一任飛寒霜主人進酒添我興泰宇光明一心定當初稅駕吾不知却見主人大明鏡一庵題罷經千年我不得見真無緣丹泉泠泠漱玉淵琪樹挺挺含春煙翠蛟舞泉勢衝石白鶴振雪聲聞天我游空洞脫塵語玉皇頷首誇詩仙

李道坦字坦之錢塘人早歲入道洞霄宮學文於隱者鄧牧

牧心甚爲所稱許有葉林元文者亦隱山中二人旣沒坦

之遂出山大德中留蘭溪與吳禮部極相得時時誦葉鄧

寄友詩云我在越君在吳馳書邀我游西湖我還吳君適



越遙隔三江共明月明月可望佳人參差笑言何時寫我  
相思知君去掃嚴陵墓祇把清尊酌黃土浮雲茫茫江水  
深感慨空勞弔今古孤山山下約陳實聯騎須來踏春色  
西湖千樹花正繁莫待東風吹雪積有酒如澠有肉如陵  
鼓趙瑟彈秦箏與君沈醉不用醒人生行樂耳何必千秋

萬歲名

吳禮部詩話

孟宗寶號集虛吳興人大德間築室苕溪為讀書地聚書千  
卷以心虛始能求道為本得正心誠意之旨後入大滌於  
碧塘福地建書院廣集同人遊居講習於其間道法表表  
學士張伯淳扁其廬鄧牧心為之作記牟巖題其像贊云

餘杭縣志

卷二十

方外二 道

天

黃冠野服翛然於大滌天柱無何有之濱吾與之虛而委

蛇其虛緣而葆其真者歟

洞霄宮志下同

吳全節用韻贈孟集虛詩東野名如賈浪仙雲孫抱道隱  
冲天乾坤體用歸虛室水火工夫治寸田見得琪花開鐵  
樹方知瑤寶結金蓮當今剩  
有徵賢使第恐聲名到日邊

王濟會孟集虛詩山中訪友人片石共危坐間參太元經  
貴在少知我耿耿兩窗燈微微竹爐火夜聞搗藥聲仙禽

警吾

吾術會孟集虛寫意詩藉藉元門士昭昭孟浩然經秋會  
有別會面喜忘筌契闊同杯酒逍遙說洞天何能佩含景

為賦卜  
居篇

孫晉燕山懷天村子孟高士詩天柱峯前隱者家山人  
曾為寄新茶幾番欲踐尋仙跡路隔中原萬里賒

徐應時為孟法師高弟至元間洞霄宮燬於火賴師更新之



道法高美爲時所推後徵召不起久之絕粒自然而化  
史德芳字元甫爲孟法師徒孫有卓識好道行時與鄧牧游  
遂棲隱山間附白鹿山房後建來青道院後改爲明星宮  
一時公卿輩交相把臂入林以詩歌贈答者甚盛常自欲  
追蹤陸永仲王元素服氣煉丹得養生之訣力作不倦陟  
險如飛

章居實黃巖人由大滌入道後終於杭州西太一宮歸葬洞  
霄工書法有詩草數集

明

金抱素邑人有才學好經史與時之名賢相往來愛洞霄山

餘杭縣志

卷二十

方外二 道

无

水棲隱松居得隱形解化之術形如瘦鶴白髮不衰後雲  
遊不知所終

賈守元洪武間提點洞霄觀宮殿傾頽元門淪廢力以恢復  
自任罄囊橐謀營建未竟其工委其徒吳逢源龔自然次  
第落成可爲洞霄宮之繼起者視榮悴爲一致樂清靜以  
立教四方嚮慕學者雲集

吳逢源字資深與前輩賈公守元善遂師事之嘗慕葛稚川  
陶隱居之爲人以清淡寡慾自怡脩然物外并通禪理尤  
長於醫後無疾朗吟而化

龔自然爲洞霄監宮卽本邑茂族士也與道會曹元隱住持



皆有聲譽授紫府符法出以救病病盡愈祈禱雨澤飢靈效後賜號徵召不赴遂化去

曹元隱本邑道會能召鶴驅雲雨得五雷法術主洞霄可竟日不食不知飢後無疾羽化

周應常亦邑之道會爲沈與真師善文學與士大夫交好充天師張真人法籙本籍吳江人其始農家子方弱冠嚮道得侍賈公守元受度永樂間與修金錄

詹道成自幼好學無書不覽煙霞爲侶希夷自宗入洞霄爲提點後以才選入太常職樂舞供奉居京師神樂觀著松居集聞母訃告歸還山喪葬盡禮四方祖送者接軫東郊

外

張復陽

初名復號南山

當湖人初業儒既娶有感棄去從朱良庵學

道妻亦爲尼善詩工畫直指孔公聞其名檄致之不時見

觸郡侯怒遂擔書往餘杭洞霄宮止焉先是洞霄石壁有

張果老題字云五百年後吾當挑書再來復陽欣然得句

云蒼苔白石淨無埃洞向風雷起處開生前欠下烟霞債

今日挑書重又來俄有虎從石壁中出弭耳隨行麾之不

去一住廿年丹就還里有司爲新一枝堂建棲元樓以居

之

李日華六研齋筆記

明周易始復之旨作復陽圖

嘉興府志

喜作雲水

游止金陵朝天宮與尹蓬頭爲友宏治三年年八十有八



尸解去舉棺甚輕如空器焉

汪珂玉珊瑚網

國朝

孫道元字善長桐川人七歲入道吳山火德廟抵信州謁張真人得養氣延年之術并授正一清微五雷大法囑曰大道非可獨善其身功全行滿始可證果耳道元受教殫力大滌山隱居不出凡祈雨立應康熙丁巳二月沐浴諭弟子曰吾去後卽有風雷至至期果然黃機題像讚管重光書其讚曰道本無始理寓諸庸惟真修士運化無窮滌山隱跡月朗天空藏神合漠致虛守中肅然者法赫然者功雷霆召而魔伏未嘗自耀其聰瞻茲德範庶幾乎太上之

餘杭縣志

卷三十

方外二 道

三

遺風

洞霄宮志

黃機洞霄宮道士孫善長碑道救濟累功以參鍊彌性二者交修然後完真度世古旌陽海瓊諸上真澹災殄患德化顯被寰宇近世如謝仲初周思得之倫著靈祈禱嗣乃習靜巖居超然懸解蓋代不數觀也若善長孫法師始有同揆者乎師諱元道別號復陽子桐川慕化鄉人父繼山遇有羽客修髯偉貌踵門告曰君家當舉子是垣中一星及母沈臨蓐見有星光爛如赤桃初生不啼不乳者彌月忽聞空中有語迺受乳甫七齡求出家父母知有夙緣送吳山火德廟襟江王師度為道士年二十四訪道遠游游嘗險阻入水不濡遇寇不刃類若有神助者及抵信州謁見張真人喜師沈靜列為弟子命高行法師太字詹君為導師傳養氣延年之術併受正一清微五雷大法呼召風雷兵將之方囑曰大道必積功行藉此福國利民若獨善其身德不被物雖得長生不能證果也師奉教潛修盡得其要嗣更雲水徧歷洞天福地尋真參攷嘗入張道遙之室又屢逢異人祕其姓氏還山時道法俱成就矣壬申秋始就鹽官令之聘行法祈雨感召殿天君降壇驗定祕諱甘露七日繇此遇歲燠澇每制撫藩臬郡邑守令敦



請登壇無不立應符篆驅邪靈蹟昭赫臺府暨縉紳先生  
好道者咸重之新本廟車騎恆滿而師則內專性命之學  
築丹室於山阿習所傳金丹要旨并置道藏全函偕門弟  
子研求闡發後游禹航樂大滌山川為祖師得道之地結  
茅為團瓢棲於宮側輒有甘泉湧出方丈之左聞風皈依  
者益眾復構古殿范真武銅儀信李忠定朱文公二像間  
還山應請施法歸滌山即閉園養靜隨機利物康熙丁巳  
二月預示化期沐浴更衣書偈云七十四年夢已殘翻身  
跳出太虛間要知復命皈根處水滿前溪雲滿山論弟子  
恪遵遺教去後即有風雷毋驚詭至期果然七日後神氣  
如生鼻垂玉柱初滌山有隙壤虎踞人莫能葬至是門弟  
子為師營厝虎跳躍後山去不復見山靈留護洵非偶然  
也師道器深邃容貌若愚常曰天道以無心為體忘言為  
用柔弱為本清淨為基道在是矣又曰此性與道同體不  
關形相了徹性命後天地而不老豈在年歷修短哉其見  
地了徹蓋如此嗚呼華陽有云仙障有九名居其一師行  
正法格天濟世聲望所集巖壑生輝獨能跌坐名山究極  
厥詣與尸解羽化同歸焉余諗知道範叩其所得皆清淨  
之正理非眩世矜奇比故為之銘曰動而神握化鈞靜  
而寂與道一寶相莊嚴溪聲山色表松阿兮永無極

餘杭縣志

卷二十

方外一 道

三

丁澎酬孫鍊師詩龍眠早歲愛丹砂肘後懸壺歷海涯自  
比杜沖稱道士能依巢谷是仙家栖真欲結中茅宇斲藥  
常蒸石洞霞不羨九天笙  
鶴近焚香終日對南華

駱鍾麟雪夜游洞霄訪孫鍊師不遇詩踏穿深雪問丹砂  
鶴背先生不住家琪樹萬峯蒼筆立翠蛟雙鎖白雲遮天  
垂鹿影崖前跡目極金根劫外車何  
日重來覓鳧鳥洞門開遍碧桃花

王穀游洞霄贈法師孫善長詩九鎖烟嵐入翠微興來登  
眺戀晴暉漢封壇壝不知處宋植松杉已漸稀山路盤旋  
青嶂合洞門虛敞白雲飛與師  
共話無生訣煮罷清泉踏月歸

沈宗熹游洞霄訪孫鍊師詩躡磴攀蘿入洞天朝元人在  
翠微巔半泓止水龍初定一縷寒香鶴正眠丹竈每能炊  
白雪石根曾說幻青蓮相逢問  
我參同契雲老松凋又幾年

金一淳大滌山道士康熙初蔣子京景祁輯瑤華集載其入

大滌山好事近詞一闕

謠華  
詞集



吳象巖孫法師弟子也得茅山術能服氣鍊神精書符籙氣象嶽嶽迴出塵表於修建宮壇頗藉其力爲洞霄振元風

垂老不倦

洞霄宮志下同

陳戴墨仁和人自幼於吳山重陽庵師孫善長學五雷祕術清修力行道法精嚴凡祈求雨澤登壇立驗巡撫范承謨禮遇甚隆時往來洞霄不輕出山康熙三十六年四十二年間海寧縣早曠師祈禱屢應仰觀者羣稱墨雲密布中恍有天神像現親掣其符去俄卽傾盆若注云

翟翥緱字太音石門人九歲事陳戴墨爲師稍長復師孫法師授以養性服氣之功得五雷大法後入洞霄宮煉將參

餘杭縣志

卷二十

方外一 道

三

元數載精熟能召鶴驅龍種種響應

魏大成字允昇桐川人性淡泊無爲若庸庸無一能者其齋修養氣得正一真傳初不以術示人後有問道者叩之皆剖晰指教不倦始識其淵源有所本也年至大耋精神不衰

孫琮大滌山魏煉師導游棲真洞金筑坪詩大滌名山秀出塵數峯雲外翠嶙峋閑行躑躅棲真洞搗藥僊禽飛傍人金筑老人坪上隱坪因人重便爲名客來若欲尋遺跡但聽松風水石聲

陸爾仁字溥沾桐川人幼秉聰明天性學靜慕孫大師清微五雷之教棄家入大滌住持將前之圯者整朽者易道院爲之一新旋以吳山火德廟爲祖庭習業吳山精岐黃凡



內外五勞虛證應手立效

貝本恆字常吉淮陽人蚤失怙恃年十七堅志慕道投武當  
袁正遇爲師度爲道士袁化後訪茅山乾元觀求王崑陽  
律師授修真戒律遂南游浙江康熙己亥結茅於武康之  
高池山參元靜鍊得祖炁符籙施符濟人祈者響應時通  
元觀沈月光法師負重望往來談道多所契合四方道俗  
受師之益者羣以真人稱之雍正己酉雲間朱椿通守金  
華採石駐武康患瘡久藥不能瘳服師符卽愈因訂方外  
交朱一日以祿壽嗣三者問師師笑而答曰祿當顯位壽  
幾毫耄嗣則艱得而晚也後皆如言乾隆乙丑餘杭邑侯  
餘杭縣志

卷二十

方外二 道

三

及紳士延師來主洞霄宮丁卯仲夏會臨安疫獄囚皆病  
請師禳之卽安次年虎晝搏人獵者被傷不敢犯師徒步  
往猝遇虎於道喝勿傷人虎頰首避自是患遂息杭州權  
關使者瑞公病痛醫罔效走書幣致師師知其不易治也  
辭不往固請乃往時戊寅八月朔連服符九日而疾少瘥  
越日恭值

今上皇帝萬壽山中啓建祝

釐道場師以是辭歸瑞躍然曰盍使我全愈亦得應期望

闕恭祝

聖壽師書符三道服之果遂其願拜跪如常人蓋師之神驗類



此者指不勝屈師住洞霄數載歲在辛未時以殿宇頽廢將募重建是冬適遭祝融爲災無塵殿一燬無遺師曰興廢遲速有數今殆非其時也惟念本山舊有志乘年久散佚若不及早摺撫則文獻無徵乃延錢唐聞人儒爲之纂輯刊刻成書以示後人俾有志興建者將以是爲嚆矢焉復慮常住山產久且蕩析無攷所存什一彙爲一冊手定章程世世遵守標其目曰萬年香火冊而自序其事於簡首師諸弟子中有童仁敷陳仁恩師之學宗郝真人先明易道之源晚造神仙之域嘗以所得示仁恩云欲明性命之理不外周易誠能壹志靜參久留自契于是仁恩奉教

垂三十年得明其旨撰成周易參議黃老指歸二書可謂傳得其人也師將辭世預囑仁敷云山運剝復之交當有起色汝宜靜守莫慮缺乏雲客往來常須接待上志之士尤宜供養久之自有當道護持復振仙源也于是出柿數枚留餉陸際蒼卽口占偈云六六經翻元洞九九丹傳鉛汞仔細端求一竅子綿密端求兩鼻孔胡麻飯破衲撥七十餘秋江南江北咄八百龍沙一一客畢竟到頭甚麼說歸來無事甚逍遙何處風光不是得仁恩侍其旁書甫畢而師化去時乾隆二十三年十一月十八日也距生康熙二十七年二月二十一日世壽七十有一迨二十三日師



猶面目如生適陸際蒼至自當湖為封龕訖建塔藏于本宮後山方丈之左陸際蒼者龍門道士陸清微也今仁恩徒孫張禮恭重修宮志乞余作師傳列之道真并鐫石嵌壁以垂永久乃撮其略而次之如此并係以贊贊曰前有靈一後有凝真越五百年貝氏載振烝清派清手握紫雲驅走帝子喝辟山君唯壹故靜唯靜斯神默契元要而匪墨云人棺上天巾几常存鏤石幽山標示後塵乾隆四十九年歲次甲辰冬十二月既望錢唐梁同書撰并書刻

胡彥昇像贊曰猶龍既出道經始傳厥後參同獨契真詮貝師靜者容寂氣專不入世網居山之巔隱文秘訣內教莫宣呼吸日月行滿三千我亦心慕骨相非仙觀師遺像如遇偃佳昔人學仙多言服食神山可到仙藥可得未易

餘杭縣志

卷二十

方外二 道

三

皮毛願生羽翼倏忽東西曾不用力豈知學仙亦如修德積功累行庶幾聖域無他謬功貝師是則子後午前金丹消息

吳穎芳大滌洞貝尊師詩嵐峯鶴去遲雲路滑藤枝相見諱名姓莫令客仙知

金姓贈洞霄貝鍊師詩踏遍名山數十秋歸尋幽洞坐山樓心堅白鹿元關石塵洗丹泉大滌邱種藥餘風隨虎去

採芝和月帶雲收常書全錄為軀瘡濟得凡緣病早瘳

厲鶚題大滌貝鍊師房調寄四塊玉詞種藥鋤匙茶筌蒼蒼宮室隱耀仙碧桃幽徑閒尋遍一炷煙九洞天九鎖泉

徐國祥字瑞五仁和人自號大滌山人幼好道書事陸溥沾為師天性淡泊知識清曠善絲桐及畫蘭竹冠絕一時每宴坐西爽閣唯左琴右書自娛有客造其門輒攜琴為一再鼓松風謾謾几案盡碧時來往洞霄有振起元宗之概



洞霄宮續  
志下同

王清虛字定然蘇州人品行卓立道法超然游大滌愛其山水佳秀洞然清幽投老於茲一時延請祈禱者無不立應名譽藉甚後無恙忽正襟危坐而化

潘一元字天崖邑人九歲甫受書聰穎異常好讀醫書擅岐黃之術後失怙慕大滌清淨棄家入道修持有得其孀母吳氏同為清修以終苦節

童仁敷字德充德清縣人幼業儒即棄家入大滌事常吉甚虔為同居法嗣力圖崇尚元風殫心振葺

餘杭縣志

卷二十

方外二 道

三

張仁逸字鶴亭仁和縣塘栖人向慕師德矢立功行遂於禾郡元妙觀恢建三清閣閣成預悉時至辭別坐解觀者如堵眾奉龕葬于觀後里人勒石載其蹟

陳仁恩洞霄宮道士乾隆己丑陳觀察夢說游大滌洞畢至方丈仁恩出所著黃老指歸周易參微并雜詠附焉夢說因與論陰符數義並歷數古人得力于陰符者幾許人而歸宿于李筌註釋之善盤桓移時而別

陳夢說撰游洞霄宮記

餘杭縣志卷三十終